

# *Kölsche Mess*



*Sundach 26. Februar 2017 um 10.00 Uhr  
in der Pfarrkirche St. Kilian*



## **Einzug: Orgelmusik**

### **Eingangslied: Melodie: „Ein Haus voll Glorie schauet“ – (GL 478)**

1. Här, Do häss enjelade  
Un fiers met uns e Fess.  
Do deis allt op uns wade,  
Un mir sin jän Ding Jäss.  
Losst uns singe, Lück,  
Unsem Herrjott hück  
Zo singer Ihr e Leed,  
Hä ess dä jode Heet
2. Di Zelt ess opjeschlage,  
Hält Pohl en Iwichkeit,  
Et Krütz, dat Du jedrage,  
Fass wie ne Massbaum steit.  
Do määs jeder rich,  
Minsch un Minsch ess jlich.  
Ejal, wat för en Klör,  
Do ließ uns durch de Döör.

**Pastor:** Ich bejröße üch all janz hätzlich.  
Loss mer aanfange met nem Jroß aan dr Herrjott:  
Uns röp zosamme dr Vatter, dr Son un dr Hellije Jeis.  
Dr Herrjott soll immer met üch sin.

**Alle:** Un och met deer et janze Levve

### **Lied: „Stammbaum“**

Su simmer all he hinjekumme, mir sprechen hück all dieselve  
Sproch. Mir han dodurch so vill jewonne. Mir sin wie mir sin, mir  
Jecke am Rhing, dat es jet, wo mir stolz drop sin.

### **Schuldbekentnis:**

#### **Pastor:**

Loss mer jetz uns Sünde bekenne. Bekenne, dat mir nit immer et  
Räächte jedonn han.

**Alle:** Herrjott, ich bekenne, dat ich off nit esu wor wie Du dat han wills.  
Do kanns mit meer nit zofridde sin. Dat jevven ich Dir zo, leeven  
Här, och üch, ihr Engel und Hellije, un üch, ihr Bröder un  
Schwestere. Keinem andere well ich et en dr Schohn däue: Ich ben  
et jewäse, un dat deit mer leid, ärch leid. Amen

**Pastor:** Leeven Här, et es wohr: mer sin nit esu, wie mer sin sollte.  
Dun uns doch verjevve un maach, dat uns de Auge opjon un  
dat uns Häng sich wäje un dat mer de Minsche leev han wie  
do. Su bedde mer durch Chrestus, unsen Här. Amen.

### **Zom Jloria: Melodie „Gott in der Höh“ (GL 172)**

Jott en dr Hüh brängt uns Ihr,  
de Mensche Fridde op Ääde.  
Do unser Vatter, hühste Zier,  
verherrlich solls du wädde.  
Här Jesus Chrestus, Sonn von Jott, mir lovve denge Namen.  
Do wonns met Jott, dem Hellije Jeis,  
em Leech vom Vatter. Amen.

### **Tagesgebet (Pastor):**

Herrjott, lenk do de Welt en dinger Odenung, domet de Kirch en Fredde  
dingen Opdraach erfülle kann.  
Doröm bedde mer durch Chrestus unsen Här. Amen.

**Lesung: 1. Korinther 4, 1-5**

**Lektor:** Dat sin Wööt vun unsem lebendije Här un Jott

**Alle:** Herrjott, meer danke deer!

### **Zwischengesang (Melodie : Taize-Halleluja):**

1. Sit nit su lahm, krepelt üch de Maue huh,  
späut en de Häng, packt ens met an.  
Lück bruchen ich, die en minge Wingberch jon  
Halleluja, halleluja.  
2. Maat kei Jeseech, loort nit möffich en de Rund,  
laacht met dem Mungk, laacht mem Hätze.  
Freud muss üch spingse us jedem Knopploch rus.  
Halleluja, halleluja.

3. Ehr sit ming Fründe, mi Rich, dat es et ör.  
Dat schenken ich üch op Äde.  
Jläuvt nur an mich, deent mit Fumm us vollem Hätz.  
Halleluja, halleluja.

### **Zom Evangelium:**

**Pastor:** Der Här soll immer met üch sin.  
**Alle:** Un och met deer et ganze Levve.  
**Pastor:** Us däm Evangelium, wie et dr Evanjelist Matthäus  
opjeschrivve hät.  
**Alle:** Mer ihren Dich, o Här.

### **Evangelium: Matthäus 6, 24-34**

### **Noh däm Evangelium:**

**Priester:** Evangelium vun unsem Här Jesus Christus  
**Alle:** Mer welle Dich lovve, Här Jesus Christus

### **Predigt: Pastor Hans-Peter Kippels**

### **Credo: Melodie „Ich glaube, Herr, dass Du es bist“ (GL 785)**

Ich jläuve, Här, dat do es bes, durch dä mer sin un levve.  
Ich jläuve och, dat Jesus Chress för uns sich hinjejevve.  
Ich jläuve an dr hellije Jeis, dä Jodes uns zo liehre weiß,  
zom Heil deit hä uns föhre.

### **Fürbitten:**

**Alle (noh jeder Fürbedde):** Hör et aan un dun et jevve.

### **Gabenbereitung: Melodie „Nun danket all und bringet Ehr“ (GL 403)**

Rießt all de Pooz un Finster op, lo't fresche Wind eren!  
Neu weed dä Jeis en Hätz und Kopp, Veränderung muss sin!

Nut, Hunger, Kreech sin en der Welt, de Jrosche hann de Maach.  
Wo doch ansich der Minsch nor zällt, dä plaaz ze krieche, laach.

Trotz jodem Welle, dä et jitt, bei Chreste op der Äd.  
Fählt uns Jetrennte noch dä Schrett, dä Einichkeit uns bräät.

Do leeve Jott, blos dinge Jeis, och en uns Hätz eren,  
domet et jedereine weiß: hä weed uns Rettung sin!

### **Gabengebete**

**Pastor:** Barmhätzige Herrjott, dat Offer soll uns vun Sünde reinije un us uns neu Minsche maache. Et soll uns helfe, dat mer su levve, wie do et wells, domet mer dä Luhn krijje, dä do uns versprochen häs. Doröm bedde mer durch Chrestus unsen Här. Amen.

### **Präfatien**

**Pastor:** Unse Herrjott soll immer met üch sin.

**Alle:** Un och met dir et ganze Levve.

**Pastor:** Losse mer uns opraafe, unsen Här zo lovve.

**Alle:** Mer sin met Hätz un Siel beim Herrjott.

**Pastor:** Mer welle dr Herrjott röhme un ihre.

**Alle:** Su es et rääch en Iwichkeit.

**Pastor:** Jo, dat ess wohr, et ess nit mih wie rääch, Deer, unsem Vatter em Himmel zo danke un met all däm, wat Do jemaat un jeschaffe häs, met all däm, wat do flüch un krüff, un met alle Minsche Dich zo lovve durch unsen Här Jesus Chrestus. Mer jehüre im ganz un künne nie jenoch doför danke, dat hä för uns jestorve ess. Mer saachen et alle Lück, denne, die et höre wolle un denne, die et nit höre wolle; mer jläuve ganz fess, dat hä nit em Dud jeblevven ess. Mer waade un hoffe un baue op sin Woot, dat hä widderkütt en Maach und Praach. Dröm wäde mer och nit möd, üvverall zo verzälle, wie joot Do uns bess, un jetz un en Iwichkeit met alle Engele en Dur un Moll, ze singe.

## **Sanctus: Melodie "Großer Gott, wir loben Dich" (GL 380)**

1. Herrjott, meer sin en de Bräng.  
Üvverall ess Nut op Äde.  
Nemm uns Vatter, bei de Hängk.  
Loss uns domet fädich wäde.  
Alles jeit, blievs Do uns noh.  
Jode Welle, dä ess do.
2. Jnädich, Här, met Maach und Kraff,  
dees du Ähd un Hemmel leite.  
Hilfs uns, wenn mer sin jeschaff,  
dees uns üvverall bejleite.  
Dankbar rofen mir dir zo:  
Hellich, hellich bes nur du.

## **Hochgebet: Hochdeutsch**

**Pastor:** Meer jläuwen an dat Jeheimnis.

**Alle:** Dat do för uns jesterve bess, bekenne meer; dat do vum Dud  
opjestande bess, röhme meer; dat do küss en Maach un Praach, dat  
hoffe meer.

**Vater unser:**

**Pastor:** Mer weede Kinder Joddes jenannt un dat si´mer och. Doröm dörfe  
meer voll Vertraue zo unsem Vatter em Himmel bedde.

**Alle:** Unse Vatter em Himmel, dinge Name welle mer hellich halde,  
di Rich loss zo uns kumme.  
Alles soll esu sin, wie Do et han wells, em Himmel un op dr Äd.  
Jevv uns hück en alle Daach, wat meer bruche för zo levve.  
Un dun uns verjevve, wammer Unrääch jedonn han,  
wie och meer verzeihe welle, die uns Unrääch dun.  
Halt vun uns fän, wat uns schade künnt, un dun uns vör allem  
Schläächte bewahre. Do bess jo Künning en Iwichkeit. Amen.

## **Friedensgruß:**

**Pastor:** Unsen Här nannt et Schalom; meer sache Fridde. Wä Schalom säht, dä weiß: Fridde kann mer nit nor hann, dä muss mer maache. Fridde met de Minsche un Fridde mem Här. Däm Här singe Fridde soll immer met üch sin.

**Alle:** Un och met Dir et janze Levve.

**Pastor:** Un jetz jevvt üch de Hand un fangt mem Fridde an.

## **Lied: „Kölsche Jung“ (Frauenchor)**

### **Vor der Kommunion:**

**Pastor:** Loort her, unsen Här ess medden unger uns.

**Alle:** Här, mer sin et nit wääd, dat Do unse Jass wees, ävver Do bruchs bloß ei Wötche zo sache, dann ess alles widder jot.

### **Zur Kommunion: „Heimat“ (Frauenchor)**

### **Nach der Kommunion: „Heimweh noh Kölle“ (Strophen Frauenchor)**

En Lechenich senn mer jeboore, mer han vill Freud en Hätz und Senn. Mer lovve Dich schon all die Johre un möchten immer met Dir sin.

*Wenn mer su an dä Herrjott denke, dann danke mer im Johr för Johr/: Hä deiht uns Freud un Fruhsinn schenke un trös och die mit Ping und Troor :/*

Leev Herrjott, dat mer nit verjesse, en unserm Jlöck och all die Lück, die nit wie mir sich freue künne, weil se et Leid zor Aäd jedröck.

*Wenn mer su an dä Herrjott denke, un sinn die Welt met all dä Ping /: Dann rofe mer: do muss jetz helfe, die Minsche solle Fründe sin :/*

Un müsse mir uns Stadt verlosse, wenn Do uns röfs zo Dir erop, dann welle mir, Ding Pänz, Dir danke, do boove en uns Motter-sproch:

*Wenn mer su an dä Herrjott denke, hüek als sing Pänz he op Äad /: Dann wolle mer uns Hätz verschenke an alles, wat hä hät jemaht :/*

**Schlussgebet (Pastor):**

**Pastor:** Barmhätzige Herrjott, do häs uns en der Meß die Jave vum Heil jeschenk. Ding Sakrament soll uns he op der Welt Kraf jevve un en de Welt , die kütt, et iwije Leeve. Doröm bedde mer durch Chrestus unsen Här. Amen.

**Schlusslied: "Wenn die Stääne am Himmel danze" (Frauenchor)****Segensgebet:**

**Pastor:** Unse Här soll met üch sin.

**Alle:** Un och met dir et ganze Leeve

**Pastor:** Jottes Sän, dä bruche mer för Liev und Siel, för Leeve un Sterve; dä Sän soll met üch sin, dä Sän vum Vatter, vum Sohn un vum Hellige Jeis. Amen

**Pastor:** Blievt zosamme en singem Fridde.

**Alle:** Mer danke Deer, o Här!

**Beim Auszug spielt der Organist: „Am Dom zu Kölle ....“**

**Zelebranten:**

**Pastor Hans-Peter Kippels, Diakon Carlos Mendoza**

**Musikalische Gestaltung:**

- **Frauenchor Lechenich**  
unter der Leitung von **Claudia Rübben-Laux**
- **Theo Balkhausen**

**Liturgische Gestaltung:**

**Werner Hanisch, Christoph Rader, Daniel Dördelmann**

**Organisation:**

**Lechenicher Narrenzunft 1936 e.V.**